



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

ODLUKA
o davanju saglasnosti na Drugu Sarajevsku rezoluciju
(prijedlog)

***Predlagač:** Gradonačelnik Grada Sarajeva*
***Obrađivač:** Gradska služba za opću upravu i zajedničke poslove*

Sarajevo, juni 2020. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 26. stav 1. tačke 2. Statuta Grada Sarajeva („Službene novine Kantona Sarajevo“, broj 34/08 – prečišćeni tekst), Gradsko vijeće Grada Sarajeva na sjednici od __.__.2020. godine, donosi:

(prijedlog)

ODLUKU
o davanju saglasnosti na Drugu Sarajevsku rezoluciju

Član 1.

Daje se saglasnost na Drugu Sarajevsku rezoluciju, koja čini sastavni dio ove Odluke.

Član 2.

Ovlašćuje se Gradonačelnik i zamjenici gradonačelnika, te Predsjedavajući i zamjenici predsjedavajućeg da potpišu Rezoluciju.

Član 3.

Odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVAJUĆI GRADSKOG VIJEĆA
GRADA SARAJEVA

Igor dr. Gavrić

Broj:
Sarajevo, __.__.2020. godina

OBRAZLOŽENJE

PRAVNI OSNOV

Pravni osnov za donošenje Odluke sadržan je u članu 26. stav 1. tačke 2. Statuta Grada Sarajeva, kojim je propisano da Gradsko vijeće Grada Sarajeva donosi odluke, druge propise i opće akte i daje njihovo tumačenje.

RAZLOZI DONOŠENJA

Budući da postoji jasna potreba da Grad Sarajevo, kao glavni grad Bosne i Hercegovine, svjetski simbol mira, slobode, ljudskih prava i suživota i kao institucija, da podigne svoj glas protiv vraćanja i širenja retrogradnih ideja fašizma i neofašizma, opravdavanja nasilja, izjednačavanja žrtve i agresora te relativiziranja zločina, te da je Grad Sarajevo, odlukom Gradskog vijeća, ove godine prvi put službeno utvrdio i obilježio 5. april kao Dan obilježavanja opsade Grada Sarajeva, najduže opsade u historiji čovječanstva koja je trajala ukupno 1425 dana u periodu od 1992.-1995. godine, rodila se ideja da Gradsko vijeće i Gradonačelnik Grada Sarajeva predlože i donesu rezoluciju kakva je i predložena.

Shodno izloženom, Gradsko vijeće Grada Sarajeva, donijelo je ovu odluku.

DRUGA SARAJEVSKA REZOLUCIJA

Preambula

Imajući u vidu da se ove godine obilježava 75. godišnjica pobjede nad fašizmom i oslobođenja Sarajeva 6. aprila 1945. godine, te Trećeg zasjedanja ZAVNOBiH-a na kojem je utvrđena državna struktura federalne Bosne i Hercegovine i donesen Zakon o Narodnoj vladi Bosne i Hercegovine.

Podsjećajući da je grupa od 108 sarajevskih uglednika, intelektualaca, zvaničnika i zanatlija 1941. godine objavila prvu Sarajevsku rezoluciju u kojoj je javno i glasno osudila zločine fašističke NDH nad Srbima, Jevrejima, Romima i Bošnjacima.

Budući da se ove godine obilježava 25. godišnjica od genocida u Srebrenici koji je presuđen na Međunarodnom krivičnom sudu u Hagu i na Međunarodnom krivičnom sudu za zločine u bivšoj Jugoslaviji.

Budući da se ove godine obilježava i 25. godišnjica potpisivanja Dejtonskog mirovnog sporazuma, u Parizu 15. decembra 1995. godine.

Razumjevajući da se cijeli svijet, Evropa, Bosna i Hercegovina i Sarajevo kao glavni grad ove godine suočio sa pandemijom Covid 19.

Budući da je Grad Sarajevo, odlukom Gradskog vijeća, ove godine prvi put službeno utvrdio i obilježio 5. april kao Dan obilježavanja opsade Grada Sarajeva, najduže opsade u historiji čovječanstva koja je trajala ukupno 1425 dana u periodu od 1992.-1995.

Imajući u vidu da i dalje postoje oni koji sistemski i javno podržavaju fašizam i zločinačke ideologije te negiraju historijske činjenice o počinjenim ratnim zločinima, opsadi i genocidu.

Budući da postoji jasna potreba da Grad Sarajevo, kao glavni grad Bosne i Hercegovine, svjetski simbol mira, slobode, ljudskih prava i suživota i kao institucija, podigne svoj glas protiv vraćanja i širenja retrogradnih ideja fašizma i neofašizma, opravdavanja nasilja, izjednačavanja žrtve i agresora te relativiziranja zločina.

Gradsko vijeće Grada Sarajeva i
Gradonačelnik Sarajeva

donose rezoluciju kako slijedi:

1.

Grad Sarajevo je bio i ostat će bosanskohercegovački, demokratski, antifašistički, multikulturni, multikonfesionalni i kosmopolitski grad.

Sarajevo je političko, administrativno, ekonomsko, kulturno i sportsko sjedište države Bosne i Hercegovine i svjetski simbol mira, slobode i otpora nasilju, podjelama i diskriminaciji.

2.

Grad Sarajevo odbacuje, osuđuje svaki pokušaj promocije i rehabilitacije fašističkih ideja, simbola, manifestacija, relativizacije historijskih činjenica o ratnim zločinima te odavanje počasti ratnim zločinima i fašističkim režimima.

3.

Pozivamo državne institucije da, bez odlaganja, donesu sveobuhvatan propis kojim će se zabraniti javno negiranje genocida u Srebrenici, isticanje fašističkih simbola i slavljenje ratnih zločina i zločinaca u cijeloj Bosni i Hercegovini. Pozivamo i Ured visokog predstavnika da, ukoliko za to nema dovoljne podrške u državnim zakonodavnim tijelima, da nametne takav propis.

4.

Grad Sarajevo ostaje otvoren, evropski, grad u kojem se nikome i nikada neće zabranjivati obavljanje vjerskih dužnosti, niko neće biti diskriminiran ni po kojoj osnovi, grad u kojem će na prvom mjestu uvijek biti sigurnost, sloboda i boljitak njegovih građana, gostiju i posjetilaca.

5.

Pozivamo sve građane Sarajeva, vladine i nevladine institucije u Bosni i Hercegovini, ali i u cijeloj regiji, da počast nevinim žrtvama odaju na dostojanstven način, bez vrijeđanja drugog i drugačijeg. Podržavamo kulturu sjećanja i institucionalno čuvanje memorije na historijske događaje u Drugom svjetskom ratu i tokom odbrambeno-oslobodilačkog rata 1992. do 1995. godine u njihovoj cijelini.

6.

Grad Sarajevo će čuvati i graditi dobre, iskrene i čvrste veze sa međunarodnim prijateljima, gradovima pobratimima, gradovima partnerima i sa svim saveznicima, bilateralno i multilateralno, jačajući na taj način poziciju i ulogu glavnog grada BiH.

7.

Apelujemo na sve nivoe vlasti u Bosni i Hercegovini da ubrzaju put Bosne i Hercegovine ka punopravnom članstvu u Evropskoj uniji, te smatramo da članstvo naše države u Sjevernoatlanskom savezu (NATO) nema alternativu te da će ono donijeti sigurnost i garanciju da fašizam nikada više neće činiti zločine na ovim prostorima.

8.

Uvjereni smo da jačanje državnih instucija, između ostalog i ustavne, političke, finansijske pozicije Grada Sarajeva, treba biti prioritet, te da će institucionalno jačanje glavnog grada osnažiti i demokratske, antifašističke i patriotske tekovine i doprinijeti općoj dobrobiti.

9.

Potpisnici ove rezolucije obavezuju se da će u svom političkom, javnom i privatnom djelovanju poštivati navedene principe, stavove i odluke te da će marljivo raditi u njihovom interesu.

Sarajevo, 24. juni 2020. godine

POTPISNICI:

**Gradonačelnik Grada Sarajeva
mr. Abdulah Skaka**

**Predsjedavajući Gradskog vijeća
Dr. Igor Gavrić**

**Zamjenik Gradonačelnika
Ivica Šarić**

**Zamjenica Predsjedavajućeg
Edina Gabela**

**Zamjenik Gradonačelnik
Milan Trivić**
